

宋陳文節公著

春秋後傳

通志堂藏板

春秋後傳左氏章指序

春秋後傳左氏章指二書故中書舍人止齋陳公傳  
良之所著也春秋之學不明久矣啖趙之後至于本  
朝而後有泰山孫先生復尊王之說彌彰公是劉先  
生啟權衡意林等書訂證尤詳伊川程先生頤雖無  
全書而一序所該聖人之大法備矣自王荆公安石  
之說盛行此道幾廢建炎紹興之初高宗皇帝復  
振斯文胡文定公安國承伊洛之餘推明師道勸講  
經筵然後其學復傳學者以為標準可謂大全矣東  
萊呂公祖謙又有集解行於世春秋之義殆無餘蘊  
止齋生於東嘉天資絕人誦書屬文一旦迥出諸老

狀

陳氏春秋後傳左氏章指十二卷

共三册存三册排架号00051

先生上斂然布衣聲名四出六經之說流行萬里之外而其學尤深於春秋鑰非深於此者嘗涉獵諸公之書非不明白然亦不過隨文辨釋間有前後相爲發明者亦不見體統所在鑰自客授之初即從止齋游雖不得執經其門嘗深叩之同在西掖時始以隱公後傳數篇相示因爲道春秋之所以作左氏之所以有功於經者其說卓然且曰自余之有得於此而欲著書於諸生中擇其能熟誦三傳者首得蔡君幼學蔡旣壯又得二人焉曰胡宗曰周勉游宦必以一人自隨遇有所問其應如響而此書未易成也未幾去國而鑰亦歸雖若相忘於江湖而朋友之來必以

此書爲問雖親炙之者跪以請則曰此某身後之書也旣不幸卒於嘉泰三年而此書始出於笥中其塔林子燕最得其傳又四年而後長子師轍與其徒汪龍友以二書來鑰老矣如獲希世之珍屏去它書窮晝夜讀之始盡得其大意嗚呼盛哉蓋未有此書也先儒以例言春秋者切切然以爲一言不差有不同者則曰變例竊以爲未安公之書不然深究經旨詳閱世變蓋有所謂隱桓莊閔之春秋有所謂僖文宣成之春秋有所謂襄昭定哀之春秋始焉猶知有天子之命王室猶甚威重自霸者之令行諸侯不復知有王矣桓公之後齊不競而晉霸文公旣亡晉不競

而楚霸悼公再霸而又衰楚興而復微吳出而盟諸夏於越入吳而春秋終矣自杜征南以來謂平王東周之始王隱公遜國之賢君其說甚詳而公以為不為平王亦不為隱公而為威王其說為有據依又其大節目如諸侯改元前所未有齊魯諸大國比數世間有世而無年至記厲王奔彘始有紀年古者諸侯無私史乘與檇杙春秋皆東遷之史也書齊鄭盟于石門以志諸侯之合書盟于鹹以志諸侯之散是春秋之終始也隱桓莊之際惟鄭多特筆襄昭定哀之際惟齊多特筆諸侯專征而後千乘之國有弒其君者矣大夫專將而後百乘之家有弒其君者矣宋魯

衛陳蔡為一黨齊鄭為一黨公會齊鄭于中丘而後諸侯之師衡行於天下罪莫甚於鄭莊宋魯齊衛次之而父子兄弟之禍亦莫甚於五國是可為不臣者之戒矣齊桓公卒鄭遂朝楚夏之變夷鄭為亂階侵蔡遂伐楚以志齊桓之霸侵陳遂侵宋以志楚莊之霸足以見夷夏之盛衰矣書公孫茲帥師書公孫敖帥師書公子季友卒習見三家之所從始首止之盟鄭伯逃歸不盟則書以其背夏盟也厲之役鄭伯逃歸不書蓋逃楚也夷夏之辨嚴矣自隱而下春秋治在諸侯自文而下治在大夫有天下之辭有一國之辭有一人之辭於干戈無不貶於玉帛之使則從其

爵勸懲著矣文十年而狄秦又三十年而狄鄭又五  
 十餘年而狄晉狄鄭猶可也狄晉甚矣貶不於甚則  
 於事端餘實錄而已矣此皆先儒所未發至僖之三  
 十一年四卜郊不從乃免牲猶三望極言魯之用天  
 子禮樂以明堂位之言為不然惠公始乞郊而不當  
 用僖公始作頌所以郊為夸引祝鮀之言為證此尤  
 為前所未聞也若左氏或以為非為經而作惟公以  
 為著其不書以見春秋之所書者皆左氏之力章指  
 一書首尾專發此意昔人以杜征南為丘明忠臣然  
 多曲從其說非忠也公之章指謂君子曰者蓋博採  
 善言禮也者蓋據史舊聞非必皆合於春秋或曰後

人增益之或曰後人依倣之或以凡例義淺而不取  
 或以例非左氏之意蓋愛而知其惡者廼所以為忠  
 也又言莊公元年至七年及十九年以後訖終篇多  
 無傳疑有佚墜公之求於傳者詳矣嗚呼與止齋游  
 前後三十年不得卒業於其門既興殄瘁之悲而後  
 得二書其間尚有欲質疑而不可得此所以撫卷三  
 歎而不能自已也開禧三年冬至日四明樓鑰序  
 先生為後傳將脫橐而病暮歲而病革學者有欲  
 速得其書俾傭書傳寫其已削者或留其帖于編  
 增入是正者或揭去弗存也勉宦江陵還始得朋  
 友訂正之然已削者可刊帖于編而增入是正者

不可復求矣惜哉勉從先生于桂陽于衡于潭日受經焉及後傳且就先生每語友朋將面授勉使盡質所疑而後出已而睽隔函文不果質今訂證猶先生之志云  
嘉定元年七月朔日門人周勉謹書

止齋先生春秋後傳卷第一

永嘉陳傅良

隱公

春秋非始於平王始於桓王也平王東遷衛鄭二

武入相於周衛武公十二年鄭詩人為之賦淇奧緇衣

凡伯仍叔家父皆大雅舊人也故五十餘年東諸侯無他故而秦亦列於國風當是時魯隱之奉其弟軌宋穆之舍其子馮諸侯猶有讓千乘之國者

也衛石碏之討州吁晉九宗五正嘉父之納鄂侯宋孔父之死於殤公臣子猶知尊君親上也魯眾仲之論族晉師服之述封建衛鄭齊秦之詩則據

經守古之士為多也鄭莊公為卿士王貳于虢於是周鄭交惡隱之三年平王崩桓王即位四年而鄭始朝身為卿士而有志於叛王糾合諸侯於是入郕又入許釋泰山之祀首為參盟成宋亂矣桓不勝忿自將以伐鄭繻葛之敗彝倫攸斃春秋所以作也是故克段于鄆盟于石門來歸祊來渝平鄭伯伐取之以璧假許田齊侯鄭伯如紀終莊公之篇皆特筆也春秋數致意焉則是作經之始也夫子論六經系文侯之命於西周之末託春秋之始於隱公著其世次以傷周之不競故曰如有用我者吾其為東周乎撥亂世反之正則其志誠在

春秋也

元年

惟王者然後改元

本何休周語宣王三十二年立魯孝公襄王十六年立晉文公則周策書舊文也

諸侯

改元自汾王以前未有也是故魯自周公至真公

九世齊自太公至武公七世晉自唐叔至靖侯五

世蔡自蔡仲至夷侯六世宋自微子至釐公八世

陳自胡公至幽公六世皆大國也但有世而無年

世家魯真公十四年齊武公九年宋釐公十七年

晉靖侯十七年楚熊勇六年陳幽公十三年始記

厲王奔彘則紀年所由起也則作史改元皆共和

之際

晉竹書紀年終宣王起殤叔蓋宣王中興諸侯復稟命至幽王而遂叛

他如吳至壽夢十

九世越至勾踐二十餘世而後始有年燕自召公  
 至昭王而後始有名秦自秦仲至文公而後始有  
 史皆僻遠晚興者也至於史法亦不盡循周制晉  
 竹書曲沃莊伯十一年十一月則用夏正為歲首  
 莊伯十一年十一月隱公之元年隱公之元年正月也見杜預左傳後序而秦譜至宣公初志閏月不  
 惟改元又改曆矣

春王正月有傳

魯謂之春秋者其書法以四時冠月也以夏時冠  
 周月非周之舊典也西周之史言時皆夏時也言  
 月皆周月也言時皆夏時於周官見之季春出火非周三月季秋納火  
非周九月仲夏斬陰木非周五月仲冬斬陽木非周十一月之類言月皆周月於書見之康誥三月

召誥二月不言夏洛誥十二月不言春多方五月畢命六月不言秋伊訓十有二月不言冬之類泰誓十有一年一月戊午蓋追改舊序十三年春之訛說未有以夏時冠周月者也惟詩以夏正數日至豳風於周正月則變文謂之一之日見章指

以夏時冠周月則魯史也夫子之修春秋每孟月  
 書時以見魯史每正月書王以存周正蓋尊周而  
 罪魯也晉之乘楚之檮杌魯之春秋皆東遷之史  
 也古者諸侯無私史本常州先生薛氏有邦國之志則小史

掌之而藏周室太史公曰唯史記獨藏周室以故滅惜哉魯人所謂周人御書

晉人所謂辛有之二子董之晉於是有董史者也  
 是故費誓繫於周書漢汝江沱至於譚大夫下國  
 之詩皆編入於南雅自三史作而國自為史矣

三月公及邾儀父盟于蔑有傳



特相盟也特相會盟不書

據傳僖二十四年晉侯會秦伯于王城僖二十八年晉侯齊侯盟于

斂孟之類唯內悉書之

夏五月鄭伯克段于鄆

有傳

曰鄭伯克段譏不在其臣子也

本穀梁目君例

克之為言勝

也以千乘之國勝其弟云爾于鄆言在外也然則

段無罪與先君之子稱公子有謂稱弟必篡若爭

國也而後但名之

據衛州吁陳佗之類

段不得列於子弟之稱

則段有罪矣段稱弟則疑於佞夫段稱公子則疑

於禦寇

秋七月天王使宰咺來歸惠公仲子之賵

有傳疑非是說在章指

周大夫不名

據傳宰周公孔毛伯衛之類

爵從其爵

據單伯劉子之類

未爵稱字

據南季家父榮叔之類

必微者而後名之

據內史叔服官師劉夏之類

卒名之

據王子虎

劉卷

舍是無名道矣而名之者貶也何貶乎宰咺命

妾母也王人未有書官者於是特書宰有賵妾母

者矣

據榮叔

必宰自為使而後貶貶其甚者也古者諸

侯不再娶再娶亦妾也

或疑再娶非妾少姜卒公如晉及河晉使士文伯來辭曰非伉儷也請君毋辱

於是隱將讓桓以夫人之禮喪其母而赴於京師

歸賵蓋命之也其曰惠公之仲子者修春秋之辭

也

九月及宋人盟于宿

魯宋合也及宋人皆微者也

木穀梁

微者雖接我不書

據傳隱四年宋使來乞師之類

內微者亦不書

據傳宣十八年公使如楚乞師昭二十七年公使子家子如晉之類止

何以書參盟之端見矣憂參盟故錄其所從始也  
冬十有二月祭伯來有傳

來未有無辭者無辭以為稱則但書來但書來所以  
介狄也據介葛盧白狄祭伯寰內諸侯無天子之命而

私交魯左氏穀梁同祭伯內諸侯也而與介狄同文苟無  
辭雖王人一以是書之

公子益師卒

二年春公會戎于潛穀梁有傳

會戎于潛春秋之始會吳黃池春秋之終此春秋  
之所以終始也

夏五月莒人入向

入君大夫將皆稱人君將則書君自楚莊王入陳  
始大夫將則書大夫自晉卻缺入蔡始惟內大夫  
則書之

無駭帥師入極

入恒稱人唯內書大夫帥師司空無駭也其曰無  
駭未命大夫也傳在八年春秋之初魯有無駭挾鄭有宛

詹紀有裂繻則猶有未命大夫也

秋八月庚辰公及戎盟于唐九月紀裂繻來逆女

春秋之初大夫恒稱人必有好事於諸侯則書其  
大夫已命字之未命名之各從其稱無譏焉爾內  
女為夫人凡八見於經未有來逆者本公羊傳例書逆

紀伯姬吾女遭人倫之變者也禮娶夫人之辭曰請君之玉女與寡人共有敝邑伯姬喪在殯紀侯失國齊人葬之魯問不及焉故詳之也穀梁氏國例今不取

冬十月伯姬歸于紀

內女為夫人恒書歸不書歸者必有故也是故齊

子叔姬不書歸文十五年出宣十六杞叔姬

不書歸成五以為嘗失位也非有故也而不書歸者

非君夫人也據宋蕩伯姬

紀子帛莒子盟于密

紀子帛闕杜預子帛裂繻字蓋意之也不取外特相盟也特相盟不書書

紀莒志諸侯之合也

十有二月乙卯夫人子氏薨無傳穀梁氏隱之妻也

夫人薨未有不葬者其不葬隱不以夫人之禮喪其妻也隱不以夫人喪其妻其曰夫人者修春秋之辭也

鄭人伐衛

鄭衛交怨也侵伐君將稱君大夫稱人據詩衛州吁使公孫子仲將文

元年衛孔達之類用眾焉稱師大夫將則書其大夫自晉陽

處父始

三年春王二月己巳日有食之三月庚戌天王崩夏

四月辛卯君氏卒有傳

聲子則曷為稱君氏隱不以夫人之禮喪其母也

於是隱將讓桓不以聲子位仲子也隱不以夫人之禮喪其母其曰君氏者亦修春秋之辭也是故不曰子氏且不言葬曰子氏卒且言葬則疑於定姒夫奉桓為太子穀傳謂探先君之邪志以與桓非是本東萊呂氏而謂已攝主隱之志也而卒遇弒終隱之篇春秋蓋三致意焉隱桓之母俱不得為夫人而隱之妻得為夫人隱桓人則君臣之分定嫡庶之義明則桓非太子君臣之分定則隱非攝主也吾魯史也何敢斥言之致意於三辭斯可矣

秋武氏子來求賻有傳

周大夫有爵稱爵未爵稱字但曰武氏子則見非大夫也微者雖王人不書據傳隱六年京師來告鐵宣九年王使來微聘之類此何以書天王崩魯賻不入來求不可以不錄也書來求賻故不書葬

八月庚辰宋公和卒冬十有二月齊侯鄭伯盟于石

門

齊鄭合也外特相盟不書必關於天下之大故也而後書莒紀無足道也齊鄭合天下始多故矣天下之無王鄭為之也天下之無伯齊為之也是故書齊鄭盟於石門以志諸侯之合書齊鄭盟於鹹以志諸侯之散事在定七年是春秋之終始也何氏所傳聞之世外離會不書非是

夫子之作春秋於隱桓莊之際唯鄭多特筆焉於

襄昭定哀之際唯齊多特筆焉。

癸未葬宋穆公

四年春王二月莒人伐杞取牟婁

外取邑不書從公穀例自隱以前則書之。曷為自隱以前

則書之春秋之初。猶以取邑為重也。據傳自桓十四年宋以諸侯伐鄭取牛首

而後皆不書

戊申衛州吁弑其君完有傳

公子州吁則曷為但稱州吁隱桓莊之春秋凡賊

皆名之於是公子初弑君衛人為之變終風日月

之詩作於宮中擊鼓作於國中也不踰年卒討之

是故州吁不稱公子而石碯得書人東遷之初國

猶有臣子矣。合五國之眾不能定州吁而殺于濮

于濮言未得國也。見衛之有臣子也。

夏公及宋公遇于清宋公陳侯蔡人衛人伐鄭

於是諸侯初會伐君將稱君大夫稱人先宋序爵

也。是定州吁之師也。曷為君大夫各從其恒稱春

秋之達例三有同號者焉。有同辭者焉。有同文者

焉。號不足以盡意而後見於辭辭不足以盡意而

後見於文以同文為猶未也。而至於變文則特書

也。於是公子初弑君衛人為之變不踰年能討之

衛猶有臣子也。而五國之君大夫伐鄭以定州吁

弑君天下之元惡也。五國之君大夫有人心焉。不

若是甚矣書曰宋公陳侯蔡人衛人伐鄭秋鞏師會宋公陳侯蔡人衛人伐鄭書之復書之終春秋纔一再見焉特書之法嚴矣則君大夫各從其恒稱是達例而已爾後衛不以衛主兵也

秋鞏師師會宋公陳侯蔡人衛人伐鄭有傳

公子鞏則曷為但稱鞏以大夫而會伐於諸侯於是始故名之也外大夫則稱人會伐未有言帥師者

據文三年叔孫得臣成八年叔孫僑如之類

特言帥師鞏弒隱者也諸侯專

征而後千乘之國有弒其君者矣大夫專將而後百乘之家有弒其君者矣

九月衛人殺州吁于濮

石碣非大夫則何以得書討賊天下之大義也苟

能討雖微者得書異邦人得書

據蔡人殺陳佗

夷狄得書

據楚子殺

陳夏徵舒書人

苟不能討雖以四國之大夫伐宋不書其大

夫

事見文十七年

疑於討也而非討則雖以十二國之君伐

齊不書伐矣

事在襄十五年

討賊天下之大義春秋重以予

人也

冬十有二月衛人立晉

有傳

公子晉也公子不稱公子必嘗爭國者也衛人立

晉則曷為以爭國之辭書之衛之臣子可以討賊

不可以置君州吁為僂而晉受之上無天子下無

君父是亦爭國而已矣繼故未有書立者賊不討

君不葬譏不在立也。是故宋殤之弒也。馮立閔之弒也。御說立晉靈之弒也。黑臀立厲之弒也。周立皆不書也。必若衛人賊討君葬而後可以書立矣。五年春公矢魚于棠。有傳并夏四月葬衛桓公。秋衛師入郕。九月考仲子之宮。初獻六羽。有傳并仲子之宮別廟也。古者妾祔於妾祖姑。無妾祖姑則易牲而祔於女君別廟。非禮也。隱將讓桓嘗以夫人之禮喪仲子為是。改築而用備樂焉。禮未之有也。是故特書初。

邾人鄭人伐宋

先邾主兵也。唯主兵雖小國敘大國之上。據桓十三年及齊侯宋公

僖二年去吳師晉師之類

非主兵也。而小國敘大國之上。則伯者為

之也。據莊十六年許男滑伯文十四年許男曹伯文十五年邾子把伯之類

世子長於小國之君

甚矣。據襄十年齊世子光滕子薛伯杞伯小邾子傳曰光先至故長於滕

螟冬十有二月辛巳。公子彊卒。宋人伐鄭。圍長葛。

宋鄭交怨也。伐國不言圍邑。從穀梁例自僖以前則書之。

曷為自僖以前則書之。春秋之初。猶以圍邑為重也。據傳自僖十八年邢狄圍衛。菟圃不書。至二十六年書楚人伐宋圍緡。之後皆不書矣。

六年春鄭人來渝。平有傳。

渝平釋憾而為平也。平不書。據傳明年宋及鄭平。宣七年鄭及晉平之類。穀梁外平不道。非

獨外也。文十六年及齊平。襄二十年及莒平。哀八年及齊平。皆不書。必關於天下之故而後書。

書鄭渝平以志諸侯之合書。及鄭平以志諸侯之

散是春秋之所終始也

夏五月辛酉公會齊侯盟于艾

春秋之初宋魯衛陳蔡一黨也齊鄭一黨也於是鄭始平魯鄭方交惡於王而亟平齊魯將以合諸侯焉爾

秋七月冬宋人取長葛

七年春王三月叔姬歸于紀

娣不書書紀叔姬吾女遭人倫之變者也紀侯失國叔姬託於紀季魯問不及焉故詳之也

滕侯卒夏城中丘齊侯使其弟年來聘秋公伐邾冬天王使凡伯來聘戎伐凡伯于楚丘以歸

八年春宋公衛侯遇于垂

特相遇不書書宋衛將以為參盟也

三月鄭伯使宛來歸祊有公羊傳

田邑皆書取據防此鄭邑也則曷為謂之來歸於是桓王即位四年矣而莊公始朝王不禮焉鄭有志於叛王而合諸侯渝平歸祊皆遜辭也糾合之道也

庚寅我入祊

入未有言我者言我交譏之辭也

夏六月己亥蔡侯考父卒辛亥宿男卒秋七月庚午

宋公齊侯衛侯盟于瓦屋

諸侯初參盟也傳曰諸侯之參盟於是始有參盟



然後有主盟矣春秋之初宋魯衛陳蔡一黨也齊鄭一黨也鄭有志於叛王而合諸侯於是渝平於魯齊亦為艾之盟以平魯為瓦屋之盟以平宋衛所謂成三國也東諸侯之交盛矣

八月葬蔡宣公九月辛卯公及莒人盟于浮來

公及大夫盟則不以大夫敵公據齊大夫晉大夫之類非大夫也

則但稱人

螟冬十有二月無駭卒

九年春天王使南季來聘三月癸酉大雨震電庚辰

大雨雪有傳例說在章指

記異也本公羊太史公曰孔子論六經記異而說不書

得春秋之指矣

挾卒有公羊傳夏城郎秋七月冬公會齊侯于防

十年春王二月公會齊侯鄭伯于中丘

王師不書據傳隱元年伐衛五年伐曲沃桓四年圍魏之類於是宋不王鄭伯復

為左卿士以王命討之會于中丘為師期也則何

以書墮天子之令於是始也東遷之後諸侯專征

矣小者修怨大者定篡弑雖然猶未衡行於天下

也鄭伯受命伐宋爾何為乎中丘之會鄭有志於

叛王而合諸侯故無王命而私會齊魯齊魯亦無

王命而私會於鄭而後諸侯之師始衡行於天下

夏鞏帥師會齊人鄭人伐宋

暈何以再不稱公子隱桓莊之世吾大夫會伐恒名之此中丘諸侯也曷為會稱君伐稱人略之也

春秋舉重一役而再有事不悉書據襄十八年會于魯齊同圍齊不書會昭三十

二年盟于秋泉城成周不書盟之類苟再見必前目而後凡也一役而再見

但人之者略之也鄭伯卿也而首墮天子之令故

畧之也

六月壬戌公敗宋師于菅會于中丘據傳宣九年楚伐鄭鄭敗之柳夢成三

外書伐不書敗伐而敗焉不足書也鄭鄭敗之柳夢成三

年諸侯伐鄭鄭敗之丘輿之類不言敗必交戰也而後言戰言敗績惟內師

悉書之勝焉則書敗某師敗則但書戰必會他國

之君大夫也而後從外辭言戰言敗績桓十三年公會紀侯鄭伯成二年

季孫行父臧孫許叔孫僑如公孫嬰齊會晉卻克衛孫良父曹公子首

辛未取郕辛巳取防

於是鄭師入郕辛未歸於我鄭師入防辛巳歸於

我則曷為以內取書之蔽罪於魯也春秋嚴義利

之辨苟以為利書吾取而已是故郕防書取譏不

在鄭也濟西田書取汶陽田書取邾田書取譏不

在晉也必若鄭伯以泰山之祊易許田而後可以

言來歸焉爾

秋宋人衛人入鄭宋人蔡人衛人伐戴鄭伯伐取之

冬十月壬午齊人鄭人入郕

此齊侯鄭伯也入國雖君將貶人之於是入宋不

書有王命也

十有一年春滕侯薛侯來朝

諸侯相朝初旅見也古者鄰國世相朝是以有兩君之好旅見非邦交之舊矣

夏公會鄭伯于時來秋七月壬午公及齊侯鄭伯入

許

入雖君將貶人之唯吾君會焉則君將稱君宋不王鄭伯以王命討之由是入邾又入許取宋蔡衛三師焉夫以王命討不庭顧因以為暴許無君者十有五年甚矣鄭之專也於是許莊公奔衛不書非其罪也凡奔非其罪不書奔非其罪莫甚於被

兵者也是故許男奔衛不書須句子奔魯不書

僖二十二年

冬十有一月壬辰公薨

有傳說在章指

魯之春秋固書曰公子翬弑公于寯氏聖人修之曰公薨春秋之法內外恒異辭遇弑君父之大哀也則吾何忍言之是故書薨而不地且不葬薨十二公所同也不地不葬隱閔所獨也然則雖諱而亂臣賊子之獄具矣

止齋先生春秋後傳卷第一

後學

成德

校訂



取許田則曷為謂之以璧假鄭伯之辭也公羊氏曰為恭也春秋之初諸侯之為惡必有辭焉以自文鄭伯以璧假許田齊侯鄭伯如紀單伯送王姬築王姬之館于外皆善辭也夫子傷周之敝曰利而巧文而不慙於春秋著其事所以見王化衰風俗日趨於變且以發明鄭莊之欺也愛段之辭立許叔之辭勞王問左右之辭足以禍五世矣

夏四月丁未公及鄭伯盟于越秋大水冬十月

二年春王正月戊申宋督弒其君與夷及其大夫孔

父有傳并公羊傳

華督則曷為但稱督隱桓莊之春秋凡賊皆名之

及其大夫孔父言不殺孔父則不能弒其君也牧

息書及以尊及卑也督先殺孔父而後弒君書及

則并也左氏得之死節人臣之極致也春秋貴死

節雖太子不書據傳衛甯喜殺太子角楚比殺太子祿必大臣也然後書大

臣誼與其君存亡者也雖大臣也苟不能與其君

存亡則亦不書是故晉欒書中行偃先殺胥童而

後弒君不言及楚商人先殺鬬勃子而後弒君不言

及死節人臣之極致春秋重以予人也孔父嘉不

名命大夫也

滕子來朝三月公會齊侯陳侯鄭伯于稷以成宋亂

會未有言其所為者其曰成宋亂弒君之禍接迹

於天下於是焉始也向也合五國之君大夫以定  
 州吁而州吁訖於討今也合四國之君以立華督  
 督遂相宋莊弒君之禍接迹於天下四君爲之也  
 春秋之褒貶至於變文嚴矣向也五國之君大夫  
 書之復書之終春秋僅一再見焉以變文爲猶未  
 也而直言其所爲舍此無復見者矣雖然有孔父  
 焉則東遷之初國猶有臣子也是故華督但名之  
 夏四月取郕大鼎于宋戊申納于太廟

於是宋以郕鼎賂公齊陳鄭皆有賂則其書取何  
 蔽罪於魯也春秋嚴義利之辨苟以爲利一以取  
 書之是故郕鼎賂魯也濟西田賂齊也書取而已

矣齊侯連五國之師抗王子突而納衛朔則書曰  
 來歸衛俘非取之者之罪矣

秋七月杞侯來朝蔡侯鄭伯會于鄧

傳曰始懼楚也

九月入杞

內恒言大夫帥師但曰入杞何唯桓師非君將皆  
 不言大夫桓師非君將則曷爲皆不言大夫桓以  
 大夫弒隱而後立故桓師非君將則其大夫專也

杜謬削公以著貶

公及戎盟于唐冬公至自唐有傳

始至盟也說在十六年至伐鄭例說在章指

三年春正月公會齊侯于贏夏齊侯衛侯胥命于蒲  
 胥命者交相命也相命也者相推長也諸侯不稟  
 於天子而私相命於是始子頹之亂虢公鄭伯胥  
 命于弭不書以其謀王室也非王事也而胥命是  
 相推長而已矣於是齊僖稱小伯黎之臣子亦以  
 方伯責衛宣桓文之事其所由來者漸矣本薛氏  
 六月公會杞侯于郕秋七月壬辰朔日有食之既公  
 子翬如齊逆女有傳  
 翬何以得稱公子大夫有好事於諸侯則各從其  
 稱無譏焉爾是故譏但稱翬無譏則從其恒稱爲  
 公子翬譏但稱忽無譏則從其恒稱爲世子忽隱

薨不地亂臣賊子之獄具矣則曷爲書翬如他大  
 夫翬弒隱而相桓魯臣子無討焉則固書翬如他  
 大夫也桓立尚童年也於是長矣而相翬如故是  
 德翬也德翬則是桓弒隱桓罪著矣名宰渠伯名  
 鄧穀之君春秋有以斷斯獄矣

九月齊侯送姜氏于謹有穀梁傳公會齊侯于謹夫人姜氏

至自齊冬齊侯使其弟年來聘有年

四年春正月公狩于郎夏天王使宰渠伯糾來聘有傳

說在章指

周大夫不名名宰渠伯聘桓也王人未有書官者  
 於是特書宰有聘桓者矣據家父齊弟年必宰自爲使而後

貶貶其甚者也

五年春正月甲戌己丑陳侯鮑卒

有穀梁傳

夏齊侯鄭伯如紀天王使仍叔之子來聘

公羊穀梁有傳

曰仍叔之子非見大夫也微者雖王人不書此何

以書桓罪著矣再聘不可以不錄也

葬陳桓公城祝丘秋蔡人衛人陳人從王伐鄭

王師不書書伐鄭伐鄭不服也伐鄭不服而後王

命不行於天下嘗戰矣而不言戰嘗敗績矣而不

言敗績諱之也春秋之初王室多諱辭其曰蔡人

衛人陳人從王伐鄭尊王也春秋之法有天子在

則其諸侯稱人有諸侯在則其大夫稱人

據隱四年蔡衛僖十八年衛邾之類

東周之不競鄭莊公為之也莊公相平王王貳于

虢至於交惡平王崩四年而鄭始朝桓於是鄭虢

相桓為左右以王命討宋不庭而合齊魯之師于

中丘入鄭又入許魯翬之相桓也宋督之相莊也

鄭有力焉王奪其政而遂不朝王固有以失鄭矣

自將以討鄭討鄭而克是仲康之師也春秋可以

無作而戰焉王卒大敗故曰伐鄭不服而後王命

不行於天下

大雩螽冬州公如曹

有傳

六年春正月寔來

有傳

以為來朝則非朝也來奔則非奔也但曰州公來



則疑於祭伯故書曰州公如曹春正月寔來是不復其國之辭也春秋之修辭謹矣古者君去其國大宰取羣廟之主以從而託於諸侯曰寓公先王所以通不得已也州公如曹寔來紀侯大去其國不書奔通不得已也

夏四月公會紀侯于成秋八月壬午大閱蔡人殺陳佗

曰蔡人殺陳佗是討賊之辭也佗之罪不著於春秋曷為以討辭書之佗殺太子免而自立者也然則佗之罪曷不著於春秋陳侯鮑卒公子與太子爭立猶兩下相殺而已矣兩下相殺不道

本穀梁例

相殺不道則其討之何以庶孽亂正統如定何勿討也書殺免則疑於齊蔡不書殺佗則疑於晉重耳春秋之修辭謹矣是故佗嘗逾年矣不成君而蔡人雖微得書人之殺不道

九月丁卯子同生

生子不書據子般子惡此何以書志莊公之不能為子也桓

公不良死於齊而不怨文姜之淫詩人所為賦敝笥載馳猗嗟也而不恥生十有三年而立三十有五年而文姜薨制於其母必齊女也然後娶而不悔莊公不足以為人子矣故其年不可以不志也冬紀侯來朝

七年春二月己亥焚咸丘夏穀伯綏來朝鄧侯吾離來朝有傳

諸侯不名爵從其爵未爵稱字據邾儀父簡叔必微不能自

通者也而後名之據邾黎來介葛盧未成君名之據鄭忽曹羈卒名

之失國名之據鄭伯突衛侯朔之類嘗失國矣雖復入歸亦名之

據衛侯鄭曹伯襄舍是無名道矣而名之者貶也名鄧穀之

君朝桓也古者鄰國世相朝魯在泰山之下鄧穀

在方城之外兩君之好不相及人而亟朝桓有朝

桓者矣據杞侯紀侯必若鄧穀而後貶貶其甚者也公羊失地之君穀梁

失國也皆非案左氏傳桓九年巴子告于楚請與鄧為好莊六年楚子伐申過鄧析侯享之十六年滅鄧不見失國事迹○失地之君不曰來朝苟

有出者如衛侯朔奔齊譚子奔莒是也苟有來者如邠伯來奔州公寔來是也

八年春正月己卯烝天王使家父來聘夏五月丁丑

烝有公羊傳

秋伐邾

但曰伐邾何桓師非君將皆不言大夫

冬十月雨雪祭公來遂逆王后于紀

逆后六書非公卿也而後書是故原莊公逆惠后

于陳不書事在前十八年召桓公逆定后于齊不書宣六年則祭

公何以書后妃母儀天下而以遂專之也祭公不

稱使則王者有成命也王者有成命而以遂專之

是故書遂始於此凡遂譏也莫甚於逆后罪祭公

且罪魯也

九年春紀季姜歸于京師

后歸不書

據傳莊十八年陳媯傳例非是說在章指

此何以書詳紀事也后妃

母儀天下以為天地社稷宗廟之主俄而宗國亡焉是不可不詳也諸侯逆稱女至稱夫人尊夫人也天子稱逆后歸稱季姜尊王也

夏四月秋七月冬曹伯使其世子射姑來朝

有穀梁傳

十年春王正月庚申曹伯終生卒夏五月葬曹桓公

秋公會衛侯于桃丘弗遇冬十有二月丙午齊侯衛

侯鄭伯來戰于郎

有傳

魯自中丘之盟於齊鄭未有異也於是齊鄭謀紀會于成紀來謀齊難也而會衛弗遇其曰來戰于

**鄭薄魯之罪也**

十有一年春正月齊人衛人鄭人盟于惡曹

此郎之諸侯也曷為戰稱君盟稱人凡一役而再見者但人之略之也猶曰上無天子下無方伯莫適為主則人自為盟而已矣鄭敗王師齊滅后之母家而衛亦抗子突以自立其無王甚矣自有參盟莫甚於惡曹故略之也

夏五月癸未鄭伯寤生卒秋七月葬鄭莊公

春秋之初罪莫甚於鄭莊宋魯齊衛次之而父子兄弟之禍亦莫甚於此五國者莊公卒高渠彌殺世子忽齊人殺子亶傅瑕殺子儀國亂者二十年

九年春紀季姜歸于京師

后歸不書據傳莊十八年陳媯傳例非是說在章指此何以書詳紀事也后妃

母儀天下以為天地社稷宗廟之主俄而宗國亡焉是不可不詳也諸侯逆稱女至稱夫人尊夫人也天子稱逆后歸稱季姜尊王也

夏四月秋七月冬曹伯使其世子射姑來朝有穀梁傳

十年春王正月庚申曹伯終生卒夏五月葬曹桓公

秋公會衛侯于桃丘弗遇冬十有二月丙午齊侯衛

侯鄭伯來戰于郎有傳

魯自中丘之盟於齊鄭未有異也於是齊鄭謀紀會于成紀來謀齊難也而會衛弗遇其曰來戰于

**鄭薄魯之罪也**

十有一年春正月齊人衛人鄭人盟于惡曹

此郎之諸侯也曷為戰稱君盟稱人凡一役而再見者但人之略之也猶曰上無天子下無方伯莫適為主則人自為盟而已矣鄭敗王師齊滅后之母家而衛亦抗子突以自立其無王甚矣自有參盟莫甚於惡曹故略之也

夏五月癸未鄭伯寤生卒秋七月葬鄭莊公

春秋之初罪莫甚於鄭莊宋魯齊衛次之而父子兄弟之禍亦莫甚於此五國者莊公卒高渠彌殺世子忽齊人殺子亶傳瑕殺子儀國亂者二十年

魯隱公弑宋殤閔相繼弑衛桓公弑宣殺伋壽而立朔國人黜朔而立黔牟齊襄公弑雍廩殺公孫無知小白殺子糾是可為不臣者之戒矣

九月宋人執鄭祭仲

祭仲足何以不名命大夫也祭仲以大夫專廢置君者也以大夫專廢置君則曷為從其恒稱而不名春秋之褒貶名號不足以盡意則見于辭書曰宋人執鄭祭仲突歸于鄭鄭忽出奔衛斯其為辭也詳矣則從其恒稱不名可也

突歸于鄭

出非其罪歸罪也則但書歸凡歸皆譏也凡歸譏

也莫甚於突故弗繫之鄭歸未有不繫國者突莊

公子也而弗繫之鄭以為是篡鄭也

據小白世生稱齊去疾展與稱皆

爭國也唯突弗繫之鄭赤弗繫之曹則篡辭也

鄭忽出奔衛

有殺梁傅

鄭忽何不能為子也身為冢嗣而廢立自權臣不可以言子矣是故書奔始於此州公如曹紀侯大去其國未可以言奔必若忽而後可以言奔爾雖然奔君未有言故者於是特言故猶愈於自取也

柔會宋公陳侯蔡叔盟于折

柔者何以大夫會諸侯盟於是始也故貶之

內大夫可以會

外諸侯穀梁例不侔

至公子結不貶矣

事在莊十九年

公會宋公于夫鍾冬十有二月公會宋公于闕  
 十有二年春正月夏六月壬寅公會杞侯莒子盟于  
 曲池秋七月丁亥公會宋公燕人盟于穀丘八月壬  
 辰陳侯躍卒公會宋公于虛冬十有一月公會宋公  
 于龜丙戌公會鄭伯盟于武父丙戌衛侯晉卒  
 再書日日衛晉之卒也於以見春秋之有日例也  
 春秋之日例莫謹於崩卒以往日赴則書往日以  
 來日赴則書來日再赴則亦再日之舍卒而稱日  
 皆大事也是故非日辭必戰也弑君也滅國而執  
 殺其君世子大夫也則日之會不日會有盟焉則  
 日盟有滅焉則日滅侵伐逐日入之則日入潰之

則日潰圍不日滅之則日滅宜日而不日者不得  
 日也凡日必甚之也是故公即位不日日定公夫  
 人至不日日哀姜諸侯奔不日日衛侯衎入不日  
 亦日衛侯衎執不日日鄆子外災不日日宋衛陳  
 鄭外敗不日日頃胡沈蔡陳許皆甚之也非甚之  
 也者而稱日則天變也郊薦之事也

十有二月及鄭師伐宋丁未戰于宋

此公及鄭伯也曷為前稱君後稱師本社略之也二

役而再見者但人之用衆焉稱師於是欲平宋鄭  
 暮歲之閒會于折于夫鍾于闕于穀丘于虛于龜  
 而宋辭平遂舍宋而會鄭師以伐宋戰焉戰不言

伐公羊氏例戰而言伐有不與戰者也據僖十八年宋曹衛邾伐齊宋及齊戰而曹衛邾不書哀

十一年公會吳伐齊齊及吳戰而魯不書未始有不與戰者而亦言伐則甚伐

者也曰戰于宋薄宋之罪也

十有三年春二月公會紀侯鄭伯己巳及齊侯宋公

衛侯燕人戰齊師宋師衛師燕師敗績有傳

三月葬衛宣公

凡君在喪恒稱子據僖九年宋子二十五年衛子定四年陳子衛宣公未葬則

其稱衛侯何不以居喪之禮出也衛朔宋固成三年陳

溺襄五年猶踰年也鄭費成三年未踰年亦曰鄭伯甚矣春

秋之法苟在喪也未踰年不成君是故衛戴公不

書卒鄭忽曹羈之奔也但書名此亦未踰年也而

自稱衛侯吾從而志之無改焉何也以其不成君

則春秋不可以弗辨苟繼世矣則春秋弗辨也從

而志之徒見其悖禮焉耳故凡春秋辭從主人皆

實錄而已非修春秋之辭也

夏大水秋七月冬十月

十有四年春正月公會鄭伯于曹無冰夏五穀梁有傳鄭伯

使其弟語來盟秋八月壬申御廩災乙亥嘗公羊穀梁有傳

冬十有二月丁巳齊侯祿父卒宋人以齊人蔡人衛

人陳人伐鄭

伐未有言以者則其言以何用諸侯之師於是始

也東遷之後諸侯雖會伐非一國之志也非一國

之志也則會者序爵而已矣據隱四年伐鄭十年伐戴桓十五年十六年伐鄭十七年伐邾皆先雖主兵也而小國序大國之上據隱五年邾鄭伐宋莊五年齊宋伐衛亦

非一國之志也以一國而用諸侯之師於是始上無天子下無方伯有以一國而用諸侯之師者矣

書以此伯之所由興也伯者之令行於天下自是無書以者書以者必中國用夷狄者也據僖二十六年公以楚師定四年蔡侯以吳子

十有五年春二月天王使冢父來求車有傳說在章指三月乙未天王崩夏四月己巳葬齊僖公五月鄭伯突出奔

蔡

奔君未有無故者鄭忽嘗言故矣於是祭仲專鄭厲公與雍糾圖之祭仲殺雍糾而後奔則其但言

奔何以是為自失國也春秋之法苟其道足以失國雖有權臣亦以自致之文書之是故鄭祭仲殺

雍糾而突出衛孫林父殺子蟜子伯子皮而衍出燕大夫殺外嬖而款出書奔而已矣

鄭世子忽復歸于鄭

忽嘗不稱世子此其加世子何從其恒稱也以其失國也不稱子以其歸國也稱世子春秋無加損

焉正其名實而已矣不稱鄭伯以是為終失國也春秋無二尊苟失國雖見殺不書是故鄭無昭公

晉無懷公稱世子以正忽之反正以反突之不正

許叔入于許



出罪也入亦罪也則悉書之據鄭良霄宋魚石晉樂盈之類出非其罪

入罪也則但書入據齊小白陽生莒去疾之類凡入皆譏也凡入譏也

則其曰許叔何以是為宜入也昔者齊鄭魯三師

入許許莊公奔衛鄭人以許東偏奉許叔而使其

大夫獲處許西偏許無君者十有五年忽突之亂

於是叔始得許若許叔可謂能復莊公之字矣是

故入未有書字者雖公子也弗謂公子此其曰許

叔所以別有罪也叔不書字則疑於齊小白陽生

莒去疾

公會齊侯于艾邾人牟人葛人來朝

朝未有書人者旅見非邦交之舊自參以上甚矣

凡朝不勝譏莫甚於自參以上是故貶人之

秋九月鄭伯突入于櫟冬十有一月公會宋公衛侯

陳侯于袤伐鄭

納厲公也會伐會盟會救會侵皆前定之辭也未

前定則書會于某而後伐宣元年非林定四年召陵同會于某而後

盟重丘會于某而後救丘會于某而後侵前定同

欲也未前定繼事也穀梁地而後伐疑辭也

十有六年春正月公會宋公蔡侯衛侯于曹夏四月

公會宋公衛侯陳侯蔡侯伐鄭秋七月公至自伐鄭

始至伐也凡至危之也隱行不至桓至盟戎而已

莊之適齊皆至之桓文有諸侯之事苟不得意則

書至

桓至杜丘文至圍許

訖於斷道而後不至者鮮矣成之瑣澤

襄之鄒之戲之役僅不至焉耳昭定之世無不至

者哀或不至至會吳伐齊至黃池之會皆危之也

是故夫人不至至出姜大夫不至至季孫意如叔

孫婣

冬城向十有一月衛侯朔出奔齊

此衛人立公子黔牟而後奔則其但書奔何以爲

自失國也春秋之法苟其道足以失國雖有篡公

子亦以自致之文書之是故衛人立黔牟而朔出

蔡人立東國而朱出邠人立君而朱儒出書奔而

已矣春秋之初人猶有讓心也魯隱之奉其弟軌

也宋穆之舍其子馮也衛伋壽之不愛其死以立

朔也則皆讓千乘之國者也俄而魯宋弑禍起衛

亦廢置君焉而諸侯相與成三國之亂於是翬相

魯桓督相宋莊衛朔拒天子之師而自立春秋於

是爲亂臣賊子作也

十有七年春正月丙辰公會齊侯紀侯盟于黃二月

丙午公會邾儀父盟于趨夏五月丙午及齊師戰于

奚六月丁丑蔡侯封人卒秋八月蔡季自陳歸于蔡

出罪也歸亦罪也則悉書之

據陳黃楚比之類

出非其罪歸罪

也則但書歸

據鄭突曹赤之類

凡歸皆譏也凡歸皆譏也則

其曰蔡季何以是爲宜歸也蔡桓侯卒無子蔡人

召季於陳而立之。是故歸未有稱字者。雖公子也。弗謂公子。此其曰蔡季。所以別有罪也。季不稱字。則疑於鄭突曹赤。

癸巳葬蔡桓侯。及宋人衛人伐邾。冬十月朔日有食之。有傳

自文以上日食有不書日者。自文而下皆書日。是故曰桓莊之世多闕文。

十有八年春王正月公會齊侯于濼。公與夫人姜氏遂如齊。夏四月丙子公薨于齊。

內諱弑書薨不地。其日公薨于齊。所以別弑也。是故弑賊不討。不書葬。見殺于他邦。雖讎不復書葬。

本穀 梁 可以攷春秋責臣子之葬矣。

丁酉公之喪至自齊。秋七月冬十有二月己丑葬我君桓公。

見殺於他邦。雖讎不復書葬。

止齋先生春秋後傳卷第二

後學 成德 校訂

新學 必斷 對信

山薇夫主春秋錄對斬卷第二

具錄於外泐雖雖不對書藝

下百公之喪至自齊錄子且冬十月二月日五葬於

止齋先生春秋後傳卷第三

莊公

元年春王正月三月夫人孫于齊有傳

此文姜也曷不稱姜氏絕之也吾君父不良死於

齊而文姜猶孫於齊莊公不可以言人子矣絕文

姜所以惡莊也

夏單伯送王姬

單伯者何天子之大夫也曷為書之如吾大夫唯

王人則以內辭書之書會書如書至書卒十四年單伯會伐宋文十

四年單伯如齊十五年單伯至自齊一如吾大夫內之也外送

女不書據傳昭五年晉侯送女此何以書吾主之也齊襄弑魯桓

天子不能正而使魯主王姬以嫁齊則魯豈無辭乎。然則單伯何以無譏譏不及單伯也

秋築王姬之館于外

有穀梁傳

冬十月乙亥陳侯林卒王使榮叔來錫桓公命

王命諸侯不書

據魯頌僖公使季孫行父請命于周他如莊十六年王命曲沃伯為晉侯莊二十七年召伯廖賜齊侯

命之類此何以書追命之也桓在位久曷為於是焉追

命之桓弑其君兄而自立比其死也而後王賜之

也桓公篡立周人以為罪矣而不能正宰渠伯糾

來仍叔之子又來將以懷柔魯也而終桓之身不

請命蓋魯無王曆者十有五年而家父之後王聘

亦不及魯於是末如之何矣而追錫命是故王不

書天本何休貶必於其重者莫重於追錫命故於是焉

貶也本薛氏昭七年傳衛齊惡告喪于周且請命王使成簡公如衛弔且追命襄公桓王未葬則榮叔

何以言使據武氏子毛伯不言使不可以三年無君

王姬歸于齊

王姬不書據傳文公八年宋襄夫人唯莊公之篇再書之曷為再

書以莊公之於齊不可與相為禮也天子嫁女於

諸侯使同姓諸侯主之則魯有主王姬者矣莫悖

於與齊婚是故特譏之春秋之書外女未有詳於

此者也書送女書築王姬之館書歸書卒皆以病

莊公也

齊師遷紀邢鄆郟

二年春王二月葬陳莊公夏公子慶父帥師伐於餘丘秋七月齊王姬卒

外夫人卒不書本公穀例雖王后亦不書據昭十五年穆后此何以書

以吾嘗為之服也然則禮與記曰齊告王姬之喪

魯莊公為之大功或曰由魯嫁故為之服姊妹之

服或曰外祖母也故為之服或之者疑之則禮未

之有也禮未之有而以意起之施諸不共戴天之

讎莊公不可以為人子矣

冬十有二月夫人姜氏會齊侯于禚有傳并穀梁傳乙酉宋公

馮卒

三年春王正月溺會齊師伐衛有傳并穀梁傳

溺者何隱桓莊之世吾大夫會伐恒名之自公孫

茲不貶矣事在僖四年

夏四月葬宋莊公五月葬桓王

會葬不書其人必有故也而後書其人文公使公

子遂葬晉侯六年叔孫得臣葬襄王九年是均周晉也

昭公使叔弓葬宋公十一年滕侯三年叔鞅葬景王二十二年是

均周宋滕也均猶可也晉景公卒成公弔喪據傳十年

卒公如晉晉人止公使送葬諸侯卒公如晉晉人止公使送葬諸侯而定王不書葬定王崩五年楚康

王卒襄公送葬而靈王不書葬據傳二十八年十一月天

楚及漢康王卒二十九年四月葬楚康王公及諸侯送葬五月公至自楚

葬靈王鄭上卿有事子展使印段往伯有曰弱不可子展曰與其莫往弱不猶愈乎遂使印段如楚杜氏葬靈王不書會不書不臣於周而誣於晉楚春秋諱

之是故春秋不徒志葬也

秋紀季以鄙入于齊

紀侯在而季以鄙入齊若以邑叛然則其稱字何  
紀侯意也春秋之初齊襄小伯自桓之始年挾鄭  
以圖紀黃之會魯爲之求成不得免焉遷邢鄆部  
紀之不絕也如綫季以鄙入齊紀於是乎始判是  
分國以與之也齊人之所欲者吾土地分國以與  
之苟可以免紀者無不爲也是紀侯意也是故季  
稱字本公不稱字則疑於宋魚石邾庶其

冬公次于滑

公行不言次必久而無名也而後言次吾君嘗久

外矣閔元年召季友于陳而莊公特書次以莊之不競

於齊也君父死焉不能討且會伐衛於是將謀紀  
難而齊卒滅紀斯可以言次矣是故魯十有二公  
惟莊昭書次舍是無書次者矣外書次必伯者之  
所以興衰也

四年春王二月夫人姜氏享齊侯于祝丘三月紀伯  
姬卒

內女爲夫人書卒不書葬本公羊穀梁外其不書卒者

必有故也是故齊子叔姬不卒鄭伯姬不卒以是  
爲嘗失位也非有故也而不卒者則不赴也紀伯

夏齊侯陳侯鄭伯遇于垂

自參以上非邦交之舊矣

紀侯大去其國有穀梁傳

諸侯去國恒書奔此其不書奔何不以奔罪加紀侯也其不以奔罪加紀侯何罪齊也黃之會魯為之求成不得免焉遷邾鄆紀之不絕如綫也紀季以鄆入於齊猶不得免焉則有去而已矣失國如紀侯庶幾有辭焉故不以奔罪加紀侯也然則何以罪齊書曰紀侯大去其國未知紀之自亡與人之亡之與曰齊侯葬紀伯姬則齊亡之也

六月乙丑齊侯葬紀伯姬

內女不葬必有故也而後書葬紀伯姬在殯齊人

取其國而葬伯姬於是特書葬不以往會也是故苟宜書葬雖不往會書之陳哀公在殯楚師滅陳輿嬖表克葬之書曰葬陳哀公苟不宜書雖王會不書楚葬康王襄公及陳侯鄭伯許男送葬至於西門之外不書也達例永足以觀春秋矣

秋七月冬公及齊人狩于禚有公羊傳

五年春王正月夏夫人姜氏如齊師秋郎犂來來朝傳曰未王命也

冬公會齊人宋人陳人蔡人伐衛

此納衛侯朝也則其不言納據昭十三北燕伯以朔入為重也入不書納是故伐鄭納突伐衛納朔書入而已矣



凡會伐有諸侯在焉則其大夫稱人。有諸侯在焉而大夫不稱人自齊國佐始。

六年春王正月王人子突救衛

自伐鄭以來王師不書其書救衛何救衛無功也

救衛無功而後王命益不行於天下是故子突貴

者也而繫諸人人子突所以微王室也本公救不書

必救而無功然後書而書救自子突始隱桓之諸

侯會盟侵伐徒以定篡弒也衛州吁之亂會者五

國宋督之亂會者四國襄之會伐鄭以立突於是

伐衛以立朔也以王子將而救衛救衛而克則是

天子猶足廢置諸侯矣昔者王嘗以一軍命曲沃

伯為晉侯詩人美之而經不書以為天子宜廢置

諸侯也天子而猶得廢置諸侯春秋可以無作而

朔終以自立故曰救衛無功而後王命益不行於

天下

夏六月衛侯朔入于衛

歸君未不言復者據僖二十八年衛侯鄭曹伯襄襄二十六年衛侯衍歸不言復

者未得國也是故鄭伯入於櫟不言復衛侯入於

夷儀不言復罪未得國也而不言復則非奔君也

據蔡侯廬陳侯吳朔奔君也其不言復何朔害伋壽而後立

衛人為之賦二子乘舟孔子取焉則其罪宜廢又

拒天子之師故入不言復與齊小白陽生同文公

羊氏曰篡辭也

秋公至自伐衛螟冬齊人來歸衛俘

七年春夫人姜氏會齊侯于防夏四月辛卯夜恒星

不見夜中星隕如雨秋大水無麥苗有公羊傳冬夫人姜氏

會齊侯于穀

八年春王正月師次于郎以俟陳人蔡人

此吾君將也據傳公子慶父請公伐齊何以稱師莊之會齊皆譏也

莫甚於及圍邾是故一貶之師行不言次成十六年我師次於督揚

不必久而無功也而後言次吾師嘗久外矣而莊

公特書次以莊之不競於齊也俟陳蔡不至及齊圍

邾邾降於齊師以正月甲午治兵及秋而還斯可

以言次矣

甲午治兵夏師及齊師圍邾邾降于齊師秋師還

內書師未有詳於此者書次書俟書治兵書還皆

特筆也師還不書書還危不得還也杜還師還與言至之義同

冬十有一月癸未齊無知弒其君諸兒

此公孫無知也其曰無知何隱桓莊之春秋凡賊

皆名之弒君者連稱管至父則其專罪無知何君

弒而無知受之則賊不在二子矣春秋誅利心是

故連稱管至父實弒齊襄無知與聞故者也而無

知受之則無知為逆首公子棄疾實弒楚靈比與

聞故者也而比受之則比為逆首苟以為利則萬

三百九十一  
乘之國弑其君者必千乘之國千乘之國弑其君者必百乘之家此孟子所以深探其本而遏亂原也

九年春齊人殺無知

無知嘗踰年則其曰齊人殺無知何是不成君之辭也向也州吁之弑衛人為之變不踰年卒討之今也無知之弑齊人亦為之變踰年卒討之是故無知不成君而雍廩得書人是國有臣子也春秋之初王道猶未墜人心猶止於禮義也衛詩為州吁作者七鄭詩為叔段作者三為忽作者五齊詩為襄公作者六晉刺獻公陳刺陳佗大抵隱桓莊

之際皆有合於春秋以此攷見諸侯放恣而學士大夫清議之公廩廩然也以齊襄之不道詩人屢致意焉冥幸一悟而長惡不已至於遇弑然不忘討賊之義故曰國猶有臣子也

公及齊大夫盟于斂

傳曰齊無君也

夏公伐齊納子糾

稱子何成糾之為子也○未踰年之君稱子襄公弑國人討無知糾自魯入小白自莒入未知其誰立也成糾之為子則糾宜立者也○糾宜立則夫子何以不予召忽予管仲成糾之為子可也成管仲之

為臣則不可也然則魯宜納與凡納所宜納皆不  
書據宋納齊孝公秦納晉文公之類必不且納也而後書襄公吾讎也而  
納其亡公子以為德是納不且納也

齊小白入于齊秋七月丁酉葬齊襄公八月庚申及  
齊師戰于乾時我師敗績穀梁有傳

內不言敗績本公羊傳諱也此其書敗績何以為不足諱  
也狐貍之敗魯於是乎始鬚不書為襄公諱也曷  
為為襄公諱以魯之救郕之力悉矣覲世子巫於  
晉猶無益於郕而莒卒滅郕於魯何譏焉故諱之  
也於升陘書戰不書敗猶為僖公諱也曷為為僖  
公諱邾人滅須句為之伐邾取須句焉而反其君

邾人來戰是忿兵而已矣齊襄吾讎也而納其亡  
公子以為德於是敗焉是納不且納也為公諱也  
是故戰不言伐戰而言伐敗之若齊有辭焉則甚  
伐者也

九月齊人取子糾殺之

魯殺糾也則其曰齊人取子糾殺之何罪小白也  
宋公使邾子用郕子春秋舍宋而書邾以為皆國  
君也可以不受命矣而稟命於宋則邾為戎首本社預  
魯受命於齊而殺糾則其罪小白何春秋之法兩  
下相殺不書雖世子也苟未嗣位殺之亦不書襄  
公弑國人討無知糾自魯入小白自莒入未知其

三百九十九  
誰立也小白得國而使鮑叔帥師臨魯以殺糾則  
是以千乘之國殺其兄焉耳譏不在魯也

冬浚洙

十年春王正月公敗齊師于長勺二月公侵宋三月  
宋人遷宿夏六月齊師宋師次于郎

其言次何以桓公之圖伯而未集也外師未有書

次者據僖二十五年晉次陽樊  
宣十五年秦次輔氏之類桓公所甚汲汲者魯也苟

不得魯不可以合諸侯宿師於郎將以誣魯爾而

非杏之會不至鄆會不至則猶未得志於魯也於

是書次用見桓之未得志於諸侯也是故書齊師

宋師次于郎以志齊伯之難書楚子蔡侯次於厥

貉以志楚伯之難於此焉可以知人心矣不苟於

從齊是人心猶有周也不苟於從楚是人心猶有

晉也有王者作天下歸往之矣齊一變至於魯魯

一變至於道孔子所以有志於魯也

公敗宋師於乘丘秋九月荆敗蔡師于莘以蔡侯獻

舞歸

夷狄交相敗不書據襄十三年楚敗吳師  
十四年吳敗楚師之類中國敗夷狄不

書據僖二年虢公敗戎于桑田  
僖八年晉敗狄于采桑之類必敗中國也而後書春秋為夷

夏而作也荆敗蔡師於莘是猶夏之始也吳敗頓

胡沈蔡陳許之師于雞父則諸夏之不亡者寡矣

是故書荆自此始而春秋以吳終焉聖人之所甚

懼也稱荆本其舊號也小雅蠻荆齊桓公伯而敢於  
 伐鄭於是始書楚自會于鄧諸侯懼楚矣而敗鄧  
 不書敗隨不書敗鄭不書雖滅申滅鄧滅息亦不  
 書也敗蔡師以蔡侯獻舞歸於是始書之是夷夏  
 之大變也春秋之法執君言以歸滅國之君言以  
 歸徒敗焉耳而言以歸則是蔡服楚也是夷夏之  
 大變也

冬十月齊師滅譚譚子奔莒

書滅始於此紀侯大去其國宋人遷宿未可以言  
 滅必若齊桓而後可以言滅矣然則滅國自齊桓  
 乎前乎此矣前乎此則曷為以首滅罪齊微桓公

則滅國之禍不接迹於天下春秋之際滅國三十  
 六五伯為之也諸侯失國恒名之則譚子何以不  
 名凡奔非其罪不書奔非其罪莫甚於被兵者也  
 是故齊魯鄭入許許男奔衛不書隱十年必國滅而後  
 書國滅而後書奔者以不死社稷也奔非其罪莫  
 甚於被兵者也雖不死社稷猶不名之也

十有一年春王正月夏五月戊寅公敗宋師于鄆傳例

說在章指秋宋大水冬王姬歸于齊

十有二年春王三月紀叔姬歸于鄆

紀亡矣曷為謂之紀叔姬存紀也國滅而復見者

善辭也據昭八年楚滅陳十一年滅蔡未始復也而再見春

秋所以錄滅國也是故紀亡矣書紀叔姬陳亡矣  
書陳災

夏四月秋八月甲午宋萬弒其君捷及其大夫仇牧  
此南宮萬也其曰宋萬何隱桓莊之春秋凡賊皆  
名之死君事必大臣然後書於是大宰督死焉則  
何以不書督弒君之賊也然則蕩意諸死於昭公  
何以亦不書昭稱人以弒則是君無道也已為大  
臣而君無道徒死焉耳不足錄也

冬十月宋萬出奔陳

向也合四國之君而後華督免於討今萬得奔陳  
自是無討賊者矣雖然猶有仇牧也

十有三年春齊侯宋人陳人蔡人邾人會于北杏穀梁有傳

春秋非主兵皆序爵也據宋齊衛盟瓦屋宋陳蔡盟折之類於是序齊於

宋之上而獨爵齊將予齊以伯也晉文公之簡曰

晉侯齊師宋師秦師據傳宋公在師皆始伯之辭也自是無

特相會者矣

夏六月齊人滅遂秋七月冬公會齊侯盟于柯

十有四年春齊人陳人曹人伐宋夏單伯會伐宋

此齊桓公以王師伐宋則其曰單伯會伐宋何於

是諸侯初用王師也春秋不以諸侯用王師故書

曰齊人陳人曹人伐宋單伯會伐宋則不以諸侯

用王師之辭也春秋之初王室猶甚威重也衛之

定州吁也陳之妻鄭忽也紀之求成於齊也皆欲假寵於王齊桓之興亦必請王師而後專伐自伯者之令行天下諸侯不知有王矣

秋七月荆入蔡冬單伯會齊侯宋公衛侯鄭伯于鄆十有五年春齊侯宋公陳侯衛侯鄭伯會于鄆夏夫

十月

十有六年春王正月夏宋人齊人衛人伐鄭宋主兵也秋荆

伐鄭說在十年荆敗蔡師冬十有二月會齊侯宋公陳侯衛侯鄭伯

許男滑伯滕子同盟于幽

諸侯初主盟也自是無特相盟者矣盟未有言同

者於是言同盟以齊桓之初主盟也夫主盟者舉天下而聽於一邦也王者不作舉天下而聽於一邦古未之有也於是始書曰同盟同衆辭也猶未予以專主是盟也再盟于幽之後天下知有齊桓而已矣內不言公諱之也

邾子克卒

向也曰邾儀父今也曰邾子已賜之爵也春秋之初諸侯猶稟命於天子大夫猶稟命於諸侯故滕侯稱子薛侯稱伯訖春秋不復焉而曲沃伯之為晉侯詩人為之賦無衣據傳王立晉哀侯立晉鄂侯又命曲沃伯為晉侯則天子猶有黜陟也挾無駭終不書族則諸侯猶有予奪也



春秋褒貶天下之君大夫而托魯以寓王法莫備于隱桓莊之世是故於諸侯有絀其爵者據杞伯卒稱子有

雖爵而名之者據鄧毅有字之者據邾儀父甚貶之者據邾人葛稱人據邾

於大夫有絀其族者據華督南宮萬有雖族但名之者據

有字之者據宋孔父陳女叔甚予之者據季子高子稱子據季子高子齊晉伯

而褒貶在桓文矣或曰夫子何以進退天下之君

大夫褒貶非春秋意也且書杞伯屢矣獨來盟稱

杞子書公子友屢矣獨來歸書季子一人之身而

進退稱焉以是為非春秋之意則春秋徒異同而

已矣

十有七年春齊人執鄭詹夏齊人殲于遂穀梁有傳

於是遂因氏領氏工婁氏須遂氏饗齊成而殺之

則其但曰齊人殲於遂何不以咎遂人也桓公伯

諸侯而喪師於亡國之餘自取之也

秋鄭詹自齊逃來

外逃不書據宣十七年高固逃歸襄十六年高厚逃歸逃來則書之書逃來譏

與之接也苟不接雖莒僕來奔宣公命與之邑季

文子使司寇出諸竟則不書苟接之矣介葛盧來

僖公在會饋之芻米則書

冬多麋

十有八年春王三月日有食之夏公追戎于濟西有傳

不言其來舉重也舉重之文約是故書公追戎於

濟西則戎來侵可知已。書公會晉師於瓦則晉來救可知已。事在定八年春秋無費辭費辭者必言故也。公子結媵陳人之婦于鄆為盟齊宋書有事于太廟為卒仲遂書雖常事以其故不可不志也。

秋有葑冬十月

十有九年春王正月夏四月秋公子結媵陳人之婦于鄆遂及齊侯宋公盟。有公穀傳夫人姜氏如莒冬齊人宋人陳人伐我西鄙。

二十年春王二月夫人姜氏如莒夏齊大災秋七月冬齊人伐戎。

二十有一年春王正月夏五月辛酉鄭伯突卒秋七月戊戌夫人姜氏薨冬十有二月葬鄭厲公。

二十有二年春王正月肆大眚癸丑葬我小君文姜。

陳人殺其公子御寇。傳言夫子作經改定公子為

殺非大夫公子皆不書。據傳晉殺丕鄭及七與大夫楚殺鬬宜申及仲歸之類

大夫則書曰大夫公子某非大夫也則書曰公子

某雖大夫公子也以討亂殺之則不書。據宋殺公子遂鄭殺公子闞楚殺

越椒之類甚者殺世子母弟亦不書。據鄭殺世子華宋殺母弟司城須必殺之

非其罪也而後書。本穀梁例稱國以殺大夫殺無罪也苟殺有罪則稱人

以殺。穀梁稱人以殺殺有罪也稱人者討辭也是故晉先都士穀

箕鄭父嘗殺先克則稱人陳公子過嘗殺偃師則

稱人非殺有罪也而亦稱人猶曰眾之殺之焉耳。

夏五月秋七月丙申及齊高傒盟于防公羊有傳冬公如齊

納幣公羊穀梁有傳

二十有三年春公至自齊祭叔來聘

聘未有不稱使者其不稱使何私相為好也自桓之伯也王室無聘魯者於是祭叔私相為好也自桓之中年則王室曷為無聘魯者王命不行於天下莊僖崩葬蓋不見於經矣是故春秋之初亟書王人書來求則猶有治不修貢之事焉書來錫命則猶有治不稟命之事焉於是祭公私相為好君子蓋有感於此而非徒以為譏也莊僖之際諸侯來聘乎盟主矣

夏公如齊觀社公至自齊

諸侯非享覲不踰境如齊觀社非禮也

荆人來聘

聘未有書人者其稱人何荆未有大夫也聘未有不稱使者其不稱使何荆未有君也荆未有君大夫也而稱人於是始蓋進之也公羊始能聘也隱桓之春秋舍王室若姻鄰無聘魯者矣經止書天王齊舍王室若姻鄰未有聘魯者而荆人先諸夏修聘於上國進之也進之也者憂之也

公及齊侯遇于穀蕭叔朝公穀梁有傳秋丹桓宮楹冬十有一月曹伯射姑卒十有二月甲寅公會齊侯盟于扈

二十有四年春王三月刻桓宮楹穀梁有傳葬曹莊公夏公

如齊逆女穀梁有傳

親逆女不書據莊十一年傳齊侯來逆共姬唯莊公特書之則以娶齊

女也於是莊公生三十七年而在位二紀矣制於其母必齊女也而後娶齊人重要之為之親納幣而觀社遇於穀盟於扈一歲而三見于齊丹桓宮楹刻其桷以飾夫人夫人猶踰時然後入大夫宗婦以幣覲此何禮也是故書逆書至而後書入夫人未有言入者入難辭也書逆以病莊公也書入以惡哀姜也亦以譏齊桓也春秋之書夫人未有詳於此者也

秋公至自齊

親逆女不書惟莊公特書之則以娶齊女也

八月丁丑夫人姜氏入戊寅大夫宗婦覲用幣大水

冬戎侵曹曹羈出奔陳赤歸于曹

凡君在喪恒稱子其曰曹羈何不能為乎也侵淺事也以千乘之國不能守不可以言乎矣雖然奔君未有言故者言故猶愈於自奔也

郭公

一十有五年春陳侯使女叔來聘有傳

諸侯初交聘也前乎此非王室若姻鄰無聘者矣案是交聘齊桓公為之也自女叔之後諸侯之會

數而朝聘皆之乎盟主矣是故吾君大夫如齊自僖之初年始春秋之初吾君大夫適他邦必有故也

據公如齊觀社公如齊納幣公如齊逆女公子翬如齊逆女公子友如陳葬原仲公子結媵陳人之婦于野皆非朝聘 有故而後

行猶私相為好而非定制也王室衰諸侯私相為好而無定制是謂亂初生也由僖而下朝聘皆之乎盟主天王狩於河陽公朝於王所天王使宰周公來聘公子遂如京師遂如晉吾未知其所終矣春秋所以作也

夏五月癸丑衛侯朔卒六月辛未朔日有食之鼓用牲于社伯姬歸于杞秋大水鼓用牲于社于門冬公子友如陳

二十有六年春公伐戎夏公至自伐戎曹殺其大夫凡殺大夫恒名之此其不名何惡君也莊公卒有戎難羈出奔陳赤於是篡曹篡而殺其大夫則必不義其君者也宋杵臼之弑也始不書賊而曰宋人以是為君無道也無道而殺大夫則亦不義其君者也是故曹僖公之大夫不名宋昭公之大夫不名

僖二十五年宋成公殺其大夫無傳

秋公會宋人齊人伐徐

公會伐書人義同五年

冬十有二月癸亥朔日有食之

二十有七年春公會杞伯姬于洸有傳夏六月公會齊

侯宋公陳侯鄭伯同盟于幽

齊初主盟於是書公矣

秋公子友如陳葬原仲冬杞伯姬來

傳例非是說在章指

此吾女也則其書來何非歸寧也凡吾之女稱伯叔季時君之女加子以是知非歸寧也內女為夫人凡八見於經未有書公會者而會自伯姬始由是來朝其子由是來求婦伯姬之為皆未之前聞也是故終伯姬之出但書來苟無辭以為稱雖吾女亦以是書

莒慶來逆叔姬

外逆女不書

據宋蕩伯姬

此何以書公自主之也

穀梁接內是

諸

侯嫁女乎大夫必使大夫同姓者主之曷為公親焉則莒慶伉也莒無大夫於是書莒慶隱桓莊之際莒嘗為強國入向取杞牟婁納公子慶父吾君特會外大夫自浮來之盟始以是知慶之敢伉也

公羊氏傳曰大夫越竟逆女非禮也則蕩氏宜書今不取

杞伯來朝公會齊侯于城濮

二十有八年春王三月甲寅齊人伐衛衛人及齊人戰衛人敗績

此齊侯也則其稱人何貶之也於是王使召伯廖錫齊侯命且請伐衛以其立子頹也齊敗衛師數之以王命取賂而還隱桓之春秋凡以王命討諸

侯皆不書至是始書之桓公不以王命討衛也桓公不以王命討衛而後王師不出向也王室有四方之事雖伐鄭不服救衛無功而執芮伯立晉侯於是猶討樊仲皮也自討樊皮而王命不見於傳記桓公爲之也凡戰不言伐戰而言伐有不與戰者也未始有不戰者而亦言伐則甚伐者也曰衛人敗績不甚敗之辭也

夏四月丁未邾子瑱卒秋荆伐鄭公會齊人宋人救

鄭

齊桓也救必無功也而後書此其爲無功何失鄭也首止之會鄭伯逃歸爲之圍新城盟世子華而

鄭少師桓公卒鄭遂朝楚諸夏之變於夷鄭爲亂

階也

冬築郿

傳例說在章指

大無麥禾臧孫辰告糴于齊

穀梁有傳

二十有九年春新延廩夏鄭人侵許秋有蜚

傳例說在章指隱元年

冬十有二月紀叔姬卒城諸及防

有傳例

三十年春王正月夏次于成秋七月齊人降鄆

次於滑也書公於郎貶師之此其但書次何以是爲不足書也

本穀梁

甚矣莊之不競於齊也君父死焉

不能討謀紀而齊滅紀及齊圍郕而郕降于齊于

是次成齊人降鄆

穀梁鄆紀之遺邑是左傳有紀鄆

雖罪齊桓也訖莊公

之身不可以不貶也

八月癸亥葬紀叔姬公羊有傳九月庚午朔日有食之鼓用

牲于社冬公及齊侯遇于魯濟齊人伐山戎穀梁有傳

三十有一年春築臺于郎夏四月薛伯卒築臺于薛

六月齊侯來獻戎捷秋築臺于秦冬不雨

三十有二年春城小穀夏宋公齊侯遇于梁丘秋七

月癸巳公子牙卒有公羊傳

季友以君命酖牙也則其書卒何喪以大夫之禮

也牙將與慶父夫人為亂雖酖之而立叔孫氏使

若死於位然是喪以大夫之禮也春秋之法苟有

誅意於其臣雖自殺也亦書殺此殺也吾從而卒

之則何以傳信於萬世不卒之則無以察魯人之

心也緣君臣之誼不得私其親緣親親之恩不與

國人慮兄弟也立叔孫氏使之若死於位然則淫

人何懼焉史著其迹春秋察其心後世有懼焉者矣

八月癸亥公薨于路寢冬十月己未子般卒有傳

君在喪恒稱子僖九年宋子定四年陳子之類卒亦稱子文十八年子卒若未葬

也則卒稱子某子般襄三十一子子野王在喪稱王某卒稱王子

某王猛王猛子非君在喪而稱子者必當國者也於是書衛

子非王在喪而卒稱王子某者亦必當國者少於

是書王子虎穀梁或云以其嘗執重以守也

公子慶父如齊狄伐邢

止齋先生春秋後傳卷第三

後學 成德 校訂



上齋先生春秋後傳卷第四

閔公

元年春王正月齊人救邢

書救邢潰而遷夷儀也

夏六月辛酉葬我君莊公秋八月公及齊侯盟于落

姑季子來歸傳有

此公子友也其稱季子何賢之斯不名之不名之  
斯以美稱稱之也季友酖牙以立般也而慶父卒賊  
般於是奔陳閔公立尚幼盟齊侯於落姑請復季  
友未知孰為之也慶父為之則閔公不弒以閔之  
見弒則非慶父之意而國人為之也國人之欲歸

季子以已亂也而季子雖歸慶父夫人亂未已俄而弒閔公於是僖公適邾則國人何賢乎季子微季子則慶父之篡成而莊公之統絕慶父之篡不成莊公之統不絕者季子在也。是故奔陳不書如邾不書全季子也。

冬齊仲孫來  
有傳

書來譏也仲孫湫則齊之命大夫也其書來何是覘魯也莊公薨子般弒而閔公幼落姑之盟嘗以請於齊矣僅能復季子而已而慶父夫人之志未可知也桓公不能正憫然使人以覘魯曰是可取乎桓公伯諸侯將因人之難以爲利書來不書聘

所以病齊桓也。  
趙子云病桓公而嘉仲孫

二年春王正月齊人遷陽夏五月乙酉吉禘于莊公

有傳

禘者何王者享其祖之所自出而以其祖配之也雍之頌曰禘太祖也周有二祖太祖文王也始祖稷也。  
太祖始祖文王儀禮祖之所自出者嚳也文王配帝於明堂稷配天於郊而嚳禘於大廟東遷之後諸侯祖天子矣於是始有太廟則亦有禘。  
據傳吳子壽夢卒臨於周廟謂文王也衛蒯瞶之禱

曰皇祖文王烈祖康叔文祖襄公是謂三祖晉亳城北之盟亦曰先王先公則魯衛晉皆相文武鄭祖厲王矣魯之郊禘惠

公請之。  
本劉恕外紀東周之僭禮也孔子曰魯之郊禘非

禮也周公其衰矣又曰禘自既灌而往者吾不欲

觀之矣入太廟每事問蓋傷之也然則春秋何以始見於閔公閔公未除喪而亟行於莊公自是用之羣公之廟據傳昭二十五年禘于襄公定八年禘于僖公之類是故特書之以其不勝譏譏其甚者耳餘具郊語中

秋八月辛丑公薨

魯之春秋固書曰公子慶父弒公于武闈聖人修之曰公薨諱之也遇弒君父之大哀也則何忍言之是故書薨而不地且不葬薨十二公所同也不地不葬隱閔所獨也然則雖諱而亂臣賊子之獄具矣

九月夫人姜氏孫于邾

文姜孫於齊絕不稱姜氏此其稱姜氏何文姜無妻道哀姜無母道是故文姜一見貶絕之哀姜再見而後貶絕也貶不於事端則必於其重者莫重於致廟則孫邾猶可言也

公子慶父出奔莒

閔薨不地且不葬亂臣賊子之獄具矣則曷為書慶父如他國慶父賊子般而弒閔魯臣子無討焉則書慶父固如他臣也季友於賊般也奔陳於弒閔也適邾須慶父奔而後入立僖魯之存僅焉耳是故宋萬奔陳雖殺之不書慶父奔莒雖殺之不書春秋所以嚴佚賊之責也季子奔陳不書適邾

不書全之也則其嚴佚賊之責何若季子可與言  
事存矣事亡則未也有季友在慶父將不免於為  
戮則曷為謂之無討均之為佚賊也

冬齊高子來盟穀梁有傳

來盟言使據桓十四年鄭語此其不言使何貴之也凡外大夫不

言使舍武氏子毛伯王喪未命皆私交也據隱元年祭伯莊二十三年祭叔二十七年莒慶宣五年

非私交也而不言使則未始有大夫者書大

夫楚屈瑕苟大夫也則不名皆貴之也貴之也者所以

別私交也貴之則曷為不言使其誼有君命之所

不及也

十有二月狄入衛

於是衛及狄人戰于熒澤衛師敗績遂滅衛則其  
但書入何不以累桓公也凡滅國有存之者則不  
言滅歸德於存之者也有乘而取之者亦不言滅  
歸罪於取之者也是故衛不言滅須句不言滅事在僖二

十一年

鄭棄其師公羊有傳

於是高克奔陳不書不足書也是故以鄭伯克段  
于鄆為義則太叔不書奔以天王出居於鄭為義  
則王子帶不書奔

止齋先生春秋後傳卷第四

後學

成德

校訂

通志堂